

Кедра Митрейлы – 120 ар.
(1892 – 1949 гг.)

28 куарусенэ 2012 аре, удмурт прозаиклы, драматурглы, поэтлы, литературоведлы Кедра Митрейлы (Дмитрий Иванович Корепановлы) вордйськем дырысен тырмысал 120 ар. Удмурт литературалы Кедра Митрей тодмо луиз «Секыт зйбет» романэн, «Зурка Вужгурт» повестен. Трос кужымзэ понйз удмурт литературной кылэз азинтонлы.



Кедра Митрей. 1920 ар.
ГКУ «ЦГА УР», фотофонд, 08465

Кедра Митрейлэн произведениосыз узырмытйзы быдэс удмурт культураез но литератураез, нош зуч кылэ берыктыса, соос удмурт калыклэн улэменыз-вылэменыз, сямьёсыныз трос лыдзисьёсыз тодматйзы. Уго, Кедра Митрей нырысетйез, кин кутскиз удмурт литератураез зуч кылэ берыктыны. Со вал аспөртэмлыко, талантливой прозаик, драматург, поэт, очеркист, фольклорист, критик, лингвист, журналист, дышетйсь...

Удмурт Элькунысь шор кун архивын утиськись документъёсысь тодматскыны быгатйськом Кедра Митрейлэн улон но творческой сюресэныз. Иоанно-Богословской черклэн метрической книгаяз гоштэмын: 16 куарусёнэ 1892 арын Глазов уездьсь Эгра черкогуртын запасной солдатлэн Иван Александрович Корепановлэн но солэн кузпалызлэн Анна Кондратовналэн вордскиз Димитрий пизы.

Дышетскйз со Эграысь церковно-приходской школаын, собере – Зураысь кык классьем училищын. 1907 арын Кедра Митрей дышетскыны пыриз Казаньысь инородческой учительской семинарие. Татын кутскиз солэн литературной ужез – поттылйз аслэсьтыз веросьёссэ лушкем потйсь «Сандал» нимо кийн гоштэм журналын. Закон Божий предметъя дышетйсен кернор поттэменыз

но Инмарлы оскымтэеныз, диплом басьтыны вуытэк, Д. Корепанов семинариын дышетсконлэсь мозмытэмын вал.

Уж утчаса, Кедр Митрей выулиз Ижевской завод поселоке, Сарапулэ, Казане, Перьме, Глазове. Нокытчы ужаны кутымтэенызы, пöртэм коньдон поттон амальёс эскериз: «Вятско-Чепецкий край» газет поттыны вуиз (потйз көня ке номер гинэ), көня ке дыр чоже Сосновка черкогуртын подьясьлэн юрттйез луыса ужаз. Озыы, пöртэм улосъёсы но ёросъёсы выулыса, огдыре ик со удмуртъёс пöлысь калык фольклор бичаз.

1912 арын Старые Зятцы черкогуртын дышетйсьлэсь дипломзэ басьтон понна экзамен сётйз. Көня ке ар чоже дышетйсь луыса ужаз Сарапул уездысь Кулаки гуртын. 1914 арын Д. Корепановез басьтйзы эксэй армие но келязы Благовещенске.

1920-тй арын Д. Корепанов берытскиз вордйськем пальёсаз. Та вакытэ со ас улонзэ герзэз дышетон удисэн: куинь ар чоже кивалтйз Зураысь но Дебесысь калык дышетонъя ёзэтэн. Трос кужым понйз та удисэз азыланьтон понна. Куронъёсын потаз калык дышетонъя Областной отделэ гуртъёсын школаос усътон понна. Школаосын удмурт кылэз дышетон пумысен дышетйсьёслы методической юрттэт сётъяз. 1922-тй арын калык дышетонъя ёзэтёслэн кивалтйсьёсылэн областной съездазы Кедр Митрей «Дебесс уездын культурно-просветительной уезжэ жутон но азыланьтон» докладэн выступить кариз. Берлогес, 1930-тй арьёсы, Удмуртской научно-исследовательской институтын ужакуз, школаосын удмурт кылэз дышетонъя учебной литература дасян бордын тыршиз. Трос кужымзэ понйз удмурт орфографияез радъян но чеберлыко литературной кылэз азинтонлы.

Шаерамы делопроизводствеоз удмурт кылэ выжтон уж мыныку, «Удмурт кыллэн аспöртэмлыкез» (1926) статья гожтйз. Отын Кедр Митрей вераз пумит луэмзэ удмурт книгаосыз уйпал но лымшор наречиосын гожтон пумысен.



«Гудыри» газетлэн редакцияз ужасьёс (К. Митрей – нырысетй
рядын паллянысен нылетйез). [1926] ар.
ГКУ «ЦГА УР», фотофонд, 03616

1923 арын Кедр Митрей «Гудыри» газетлэн редакцияз ужаны лыктйз: нырысь литературной сотрудник луыса тыршиз, берло юнматйзы редакторе.

1928 арын Д. Корепанов нош берытскиз дышетон удысэ. 1930-тй арозь Глазовысь педтехникумлэн кивалтйсез луыса ужаз.

Д.И. Корепанов вань улытояз кыстйськиз тодон-валан басытонлы. 1930-тй арын со дышетскыны пыриз Москваысь научно-исследовательской институтысь аспирантурае, нош кык ар ортчыса, Удмурт пединститутысь удмурт кылья но литература кафедралэн кивалтйсез луиз. 1934-1937-тй арьёсы Кедр Митрей удмурт писательёслэн огазеясконзылэн төроез луыса ужаз, озыы ик, СССР-ысь писательёслэн радазы кутэмын вал. Та арьёсы гожтэмын вал трос статьяос, веросьёс, драмаос. Кедр Митрейлэн та удысын ужомез пумысен архив документъёс пыр-поч эскерымон луонлык сёто. Соос трос пöртэмесь: веросьёсын рукописьёс, критической веранъёс, рецензиос но докладъёс. Архивын утисько тодмо литературной критикъёслэн Кедр Митрей но солэн гожтэм ужъёсыз пумысен малпанъёссы.

1937-тй арын Кедр Митреез, буржуазной националист но удмурт калыклэн тушмонэз шуыса, янгыше уськыто. Та арын ик сое тямыс арлы Колымае келяло. 1947-тй арын сое мозмыто, нош 1948-тй арын выльысь ссылкае келяло. Отысь солы берытскыны кылдымтэ. 1949-тй арын Новосибирск улосысь Чумаково черкогуртын Кедр Митрей висыса кулэ.

1956-тй арын, КПСС-лэн XX-тй съездэз бере, Кедр Митреез реабилитировать каризы.

Ужез но зэмлыкез яратйсь, калык понна тыршись, азылане кыстйськись адымилэн, Кедр Митрейлэн кельтэм ужез, Удмурт шаерлэн историяз баджым пыты кельтйз.

Удмурт Элькунысь шор кун архивысь
научно-исследовательской но методической уж нуонъя
отделэн кивалтйсьлэн воштйсез
Е.С.Воронцова